

## **INTRODUCCIÓN**

### **1.1. Marco legal**

A presente programación baséase no seguinte corpus legal:

A Lei orgánica 2/2006, de 3 de maio, de Educación, modificada pola Lei orgánica 8/2013, de 9 de decembro, para a mellora da calidade educativa. Neste establécese que as ensinanzas de idiomas de réxime especial se organizan nos niveis básico, intermedio e avanzado e que os ditos niveis se corresponderán, respectivamente, aos niveis A, B e C do Marco Europeo Común de Referencia para as Linguas (MECRL), que se subdividen, á súa vez, nos niveis A1, A2, B1, B2, C1 e C2.

O Real decreto 1041/2017, do 22 de decembro, fixa as esixencias mínimas do nivel básico para os efectos de certificación e o currículo básico dos niveis intermedio B1, intermedio B2, avanzado C1 e avanzado C2 dos idiomas impartidos nas escolas oficiais de idiomas, co fin de asegurar unha formación común e garantir a validez dos certificados correspondentes.

O Decreto 81/2018, do 19 de xullo, polo que se establece o currículo dos niveis básico A1, básico A2, intermedio B1, intermedio B2, avanzado C1 e avanzado C2 das ensinanzas de idiomas de réxime especial na Comunidade Autónoma de Galicia, dispón, no seu artigo 6.2 que a consellería competente en materia de educación establecerá o procedemento para a elaboración das guías curriculares de cada idioma, que serán comúns para todos os centros e deberán desenvolverse mediante as correspondentes programacións didácticas.

Circular 3/2019, da Dirección Xeral de Educación, Formación Profesional e Innovación Educativa, pola que se ditan instrucións para a preinscrición, admisión, matrícula e organización académica nas escolas oficiais de idiomas de Galicia no curso 2019-2020.

Circular 8/2019, da Dirección Xeral de Educación, Formación Profesional e Innovación Educativa, pola que se ditan instrucións para a elaboración e administración das probas de certificación das ensinanzas de idiomas de réxime especial para o curso 2019-2020.

### **1.2. Contexto educativo**

A Escola Oficial de Idiomas de Ourense é un centro público dependente da Consellería de Educación e Ordenación Universitaria dedicado á ensinanza de idiomas para adultos.

A súa sede central atópase na capital da provincia, a 3ª cidade galega con case 106.000 habitantes (un terzo da poboación da provincia, na que viven preto de

315.000 persoas). Está situada na área urbana da cidade, nunha zona que agrupa unha grande cantidade de instalacións educativas, entre elas o campus universitario, preto do centro da cidade.

Para satisfacer as necesidades de todo o territorio conta con 6 seccións delegadas asentadas en centros de Educación Secundaria de diferentes poboacións: A Ponte - Ourense (IES Blanco Amor), Celanova (IES Celso Emilio Ferreiro), O Barco de Valdeorras (IES Lauro Olmo), O Carballiño (IES Chamoso Lamas), Ribadavia (IES Abrente), Verín (IES García Barbón).

O centro ten un amplo horario de apertura, de 08.00 a 22.00, ao longo do cal se imparten ensinanzas de Alemán, Chinés, Francés, Galego, Inglés, Italiano e Portugués, dos niveis básico, intermedio, avanzado e C1 e Español para estranxeiros que este ano oferta o nivel intermedio B2, ademais do básico A2 e o intermedio B1.

Así mesmo, a nosa Escola colabora con outras entidades como o CFR, impartindo cursos para o profesorado, e coa Dirección Xeral de Política Lingüística, con cursos de Linguaxe Administrativa Galega e de preparación ás probas oficiais Celga.

A nosa ensinanza está destinada a maiores de 14 anos e, dado que non é obrigatoria, a maioría do alumnado asiste por vontade propia.

Na actualidade, o número de matrículas oficiais está en torno ás 2.500. O máis destacable do noso alumnado é a súa heteroxeneidade no tocante á ocupación, á formación e á motivación. Con respecto á idade a maioría do alumnado está na franxa comprendida entre os 18 e os 50 anos.

Por sexos, predominan as mulleres sobre os homes.

A EOI de Ourense conta tamén cunha pequena porcentaxe de alumnado con discapacidade e de alumnado é estranxeiro.

Esta diversidade contribúe ao enriquecemento cultural e en valores persoais e sociais.

A maioría do noso alumnado compaxina os estudos de idiomas con outras obrigas de carácter formativo, laboral ou familiar, por iso asiste ao centro só durante as sesións de clase e, en menor medida, para participar en diversas actividades extraescolares.

Por outra banda, o feito de que as Ensinanzas de Idiomas non sexan obrigatorias e de que o alumnado decida asistir por vontade propia garante un bo clima de convivencia.

### **1.3. Características do departamento**

O departamento de Italiano da Escola Oficial de Idiomas de Ourense comezou o seu labor no curso 2004/2005. Na actualidade oferta os niveis básico A2, intermedio B1, intermedio B2 e avanzado C1 (2º ano de implantación).

Ao longo dos cursos foi fixando un alumnado que pasaba das 200 persoas nos primeiros anos e que hoxe conta cun centenar de persoas inscritas. Segundo esta demanda, o cadro docente conta con 2 postos fixos e un provisional.

O noso departamento caracterízase pola promoción da lingua e a cultura italianas na escola e nos espazos públicos da nosa cidade. Por iso organizamos e fomentamos a participación en actividades culturais e sociais de aprendizaxe tanto nas aulas coma fóra delas.

Ademais colaboramos e propoñemos actividades de formación permanente do profesorado que nos permitan realizar unha aprendizaxe continua e mellorar o noso labor didáctico.

Na actualidade compartimos o espazo do noso departamento cun dos novos departamentos da escola, o de Chinés.